


妙法蓮華經通義 卷二

C40
4514
(11)



80 1 2 3 4 5 6 7 8 9 90 1 2 3 4 5 6 7 8 9 100 1 2 3 4 5 6 7 8 9

妙法蓮華經通義卷第二

姚秦三藏法師鳩摩羅什奉 詔譯

沙門慈山釋德清述

當山三冊卷十 妙法蓮華經通義卷第二 姚秦三藏法師鳩摩羅什奉 詔譯 宋普賢寺住持慈山

此章顯情故曰譬喻此品來意 以顯今實二乘一向自

8 B 4823


絕成佛之望身子上根既聞佛慧心歡喜
自信作佛故速領悟之懷世尊特為授記勇
中下根人尚執權乘未肯頓捨故佛說火宅

C40-4514

了翁上座請大藏及有
家書置於洞雲山
我徵英瑛院宜府中未
為學者不敢許出院內
當山三世鐵牛機謹誌



B-64853



妙法蓮華經通義卷第二

姚秦三藏法師鳩摩羅什奉

詔譯

明南嶽沙門憨山釋德清述

妙法蓮華經譬喻品第三

品名譬喻者比事類情故曰譬喻。此品來意
由佛法說盡廢昔權以顯今實。二乘一向自
絕成佛之望。身上根既聞佛慧心大歡喜。
自信作佛。故述領悟之懷。世尊特為授記。第
中下根人。向執權乘未肯頓捨。故佛說火宅

法苑珠林 卷二
諭許賜諸子三車一車之權實中根之人始
得領悟。故此品來也。共下九喻各有所主。以
前說如來出世爲一大事因緣。今以長者驚
入火宅救濟諸子又爲一大事之譬喻也。

爾時舍利弗踴躍歡喜卽起合掌瞻仰尊顏而
白佛言。今從世尊聞此法音心懷踊躍得未曾
有。所以者何。我昔從佛聞如是法見諸菩薩受
記作佛而我等不預斯事。甚自感傷。失於如來
無量知見世尊。我常獨處山林樹下若坐若行

每作是念。我等同入法性。云何如來以小乘法
而見濟度。是我等咎。非世尊也。所以者何。若我
等待說所因成就。阿耨多羅三藐三菩提者。必
以太乘而得度。脫然我等不解方便。隨宜所說
初聞佛法。遇便信受。思惟取證。世尊我從昔來
終日竟夜。每自剋責。而今從佛聞所未聞。未曾
有法。斷諸疑悔。身意泰然。快得安隱。今日乃知
真是佛子。從佛口生。從法化生。得佛法分。

此身子自叙今得之欣懷。悔昔不知之過咎。

也。踊躍下慶今之得。所以下傷昔之失。我常
下悔。怨佛之過也。身子雖小乘。蓋蒙佛恩。受
佛教。非一日矣。尚不知佛心。將以爲偏黨。況
其他乎。是知師資水乳。從昔所難也。若我等
下。敘知佛心不偏。乃貪小自誤之過。我從下
慶今之得。前云。若我弟子不信此法。非真羅
漢。故身子自信以真子。自許也。真子乃因聞
佛說真實之法。而出故云。從佛口生。化我一
向。執着鄙吝之心。故云。從法化生。今法王大

寶自然而至。故云。得佛法分也。

爾時舍利弗欲重宣此義。而說偈言。

我聞是法音。得所未曾有。心懷大歡喜。疑網皆
已除。昔來蒙佛教。不失於大乘。佛音甚希有。能
除衆生惱。我已得漏盡。聞亦除憂惱。我處於山
谷。或在林樹下。若坐若經行。常思惟是事。嗚呼
深。自責云。何而自欺我。等亦佛子。同入無漏法。
不能於未來演說。無上道。金色三十二。力諸
解脫。同共一法中。而不得此事。八十種妙好。十

法華通義 卷二
八不共法如是等功德而我皆已失我獨經行
時見佛在大衆名聞滿十方廣饒益衆生自惟
失此利我爲自欺誑我常於日夜每思惟是事
欲以問世尊爲失爲不失我常見世尊稱讚諸
菩薩以是於日夜籌量如是事今聞佛音聲隨
宜而說法無漏難思議令衆至道場我本著邪
見爲諸梵志師世尊知我心拔邪說涅槃我悉
除邪見於空法得證爾時心自謂得至於滅度
而今乃自覺非是實滅度若得作佛時具三十

二相天人夜叉衆龍神等恭敬是時乃可謂永
盡滅無餘佛於大衆中說我當作佛聞如是法
音疑悔悉已除初聞佛所說心中大驚疑將非
魔作佛惱亂我心耶佛以種種緣譬喻巧言說
其心安如海我聞疑網斷佛說過去世無量滅
度佛安住方便中亦皆說是法現在未來佛其
數無有量亦以諸方便演說如是法如今者世
尊從生及出家得道轉法輪亦以方便說世尊
說實道波旬無此事以是我定知非是魔作佛

我墮疑網故謂是魔所爲。聞佛柔軟音深遠甚微妙。演揚清淨法。我心大歡喜。疑悔永已盡。安住實智中。我定當作佛。爲天人所敬轉。無上法輪。教化諸菩薩。

此頌身子領悟。自叙昔失之疑。晨轉再三而申其情。以慶今得而大喜也。我聞下十句。叙今已得知。昔不失以除憂。我處下二十四句。叙悔責昔失之過咎。我常下八句。叙尋常懷疑而不決。今聞下二十句。叙今聞法知非悔。

責昔日著邪之自誤。佛於下四句。叙慶今得已除疑。結頌長行。初聞佛所說下三十六句。重陳疑狀。以釋不疑之所以甚矣。人心之難悟也。佛明教猶疑而不信。將以醍醐爲毒藥耳。初身子請說。世尊止之曰。不須復說。若說是事。一切天人皆當驚疑。始而將謂無可驚疑者。今身子自陳其情曰。初聞佛說。則心大驚疑。甚至以佛爲魔者。是則幾乎永絕其分矣。則驚疑之狀可知。若非佛以種種因緣而

法苑珠林卷二
調伏之則此疑不能釋其心終不能安也以
引三世諸佛之儀式始信佛心乃知波旬無
此事以我墮疑網故以佛爲魔耳。柔軟微妙
者感佛法說種種因緣以顯實。且佛囑云心
生大歡喜自知當作佛。故我心歡喜自知定
當作佛也。如來出世爲此二乘無論往昔因
緣卽今已費四十年之苦心今日剛得一人
信受而不疑。是知師資雅合利生之事豈易
易哉

爾時佛告舍利弗吾今於天人沙門婆羅門等
大衆中說我昔曾於二萬億佛所爲無上道故
當教化汝汝亦長夜隨我受學我以方便引導
汝故生我法中舍利弗我昔教汝志願佛道汝
今悉忘而便自謂已得滅度我今還欲令汝憶
念本願所行道故爲諸聲聞說是大乘經名妙
法蓮華教菩薩法佛所護念

此敘身子久蒙佛化之因緣顯今緣熟而得
記也。法界以緣起爲宗。故佛性有正因緣因。

法苑珠林卷三
七
所謂佛種從緣起。故衆生雖具正因佛性。若不遇諸佛菩薩善發出世教化爲緣。則終難顯了。所謂佛以一大事因緣出現世間。此經重在緣因。今身子雖信自當作佛。而追敘其昔日之疑。將謂已失成佛之利。故佛說昔化之本因已。教成佛之緣種但忘之耳。非失之也。故今雖說聲聞成佛。但令知其本有自信而已。非別有所增益也。此法華經乃成佛之因緣。一向不說。故云護念。今已說之以見緣

熟。所謂付囑。故爲授記。下諸弟子授記。皆此意也。

舍利弗。汝於未來世。過無量無邊不可思議劫。供養若干千萬億佛。奉持正法。具足菩薩所行之道。當得作佛。號曰華光。如來應供。正徧明知。行足善逝。世間解。無上士調御丈夫。天人師。佛世尊。國名離垢。其土平正清淨。嚴飾安隱。豐樂天人。熾盛琉璃爲地。有八交道。黃金爲繩。以界其側。其傍各有七寶行樹。常有華果。華光如來。

亦以三乘教化衆生舍利弗彼佛出時雖非惡世以本願故說三乘法其刼名大寶莊嚴何故名曰大寶莊嚴其國中以菩薩爲大寶故彼諸菩薩無量無邊不可思議算數譬喻所不能及非佛智力無能知者若欲行時寶華承足此諸菩薩非初發意皆久植德本於無量百千萬億佛所淨修梵行恒爲諸佛之所稱歎常修佛慧具大神通善知一切諸法之門質直無僞志念堅固如是菩薩充滿其國舍利弗華光佛壽十

二小刼除爲王子未作佛時其國人民壽八小刼華光如來過十二小刼授堅滿菩薩阿耨多羅三藐三菩提記告諸比丘是堅滿菩薩次當作佛號曰華足安行多陀阿伽度阿羅訶三藐三佛陀其佛國土亦復如是舍利弗是華光佛滅度之後正法住世三十二小刼像法住世亦三十二小刼

此說授記之事也。記亦云記荊荊者草菜之種子。意顯因果不爽也。身子自知作佛而授

法苑珠林卷二
記猶過多劫事多佛具菩薩道而後成者以
聲聞一向安住小乘已絕成佛之分非佛教
化之本懷故於四十年來種種因緣發起捨
小樂大之心而竟不得以其不信自心是佛
故也以不信是佛故一切菩薩道法利生事
業皆非己分所以歷劫無明全然未破是爲
焦芽敗種耳世尊多方調伏直至今日方肯
自信然所信者乃不生滅心此心是爲成佛
之真因故從此可以進修成佛之行矣然菩

薩所修成佛之行以四弘誓願爲本度無邊
之衆生斷無盡之煩惱學無量之法門成無
上之佛道以二乘向有佛道長遠之怖安肯
發此大心哉以今旣信自心正可教以大行
所謂教菩薩法也供多佛修福具諸行修慧
也福慧兩足四弘誓願已滿所以爲成佛之
因故歷多劫而後得果各實並充依正俱妙
宜矣身子成佛號華光者此隨因獨得之名
也華爲因光爲智以身子夙因智慧故果亦

法華通義 卷二
如之十號諸解甚詳。此佛之通號也。國名離垢。則不比娑婆。亦說三乘。乃隨其本願。劫名大寶。則時非五濁。菩薩無數。則純一上根。壽十二小劫。則非滅劫。將滅轉授堅滿之記。則使妙法傳續無窮。正法像法住世三十二小劫者。以時非五濁。人無三惡。故法住之久宜矣。此所謂未來之佛也。然諸弟子授記成佛。依報莊嚴。眷屬殊勝。法住久遠。一一皆超過於釋迦者何也。以華藏世界二十重佛剎殊

勝微妙者多。獨娑婆一土穢惡不堪。乃同一類惡業衆生所感。同業煩惱之報土。乃應身佛調伏衆生之地。非實報微妙之境也。今諸聲聞成佛。乃直指其實報莊嚴。以佛佛斷盡煩惱。純一淨因。故所感酬因之報。亦清淨無比。此雖殊勝。特華藏中一塵毛耳。豈能盡法界之量哉。惟我毘盧遮那證窮法界。故通一華藏而爲化境。此其佛智甚深。不可思議。難信難解者此也。後言長者其家大富。其子卽

法華通義 卷二
十
克紹家業所須不過盡一己之量而已。豈能
盡長者之所有哉。以此觀之則可以窺此經
之歸趣矣。

爾時世尊欲重宣此義而說偈言

舍利弗來世成佛普智尊號名曰華光當度無
量衆供養無數佛具足菩薩行十力等功德證
於無上道過無量劫已劫名大寶嚴世界名離
垢清淨無瑕穢以琉璃爲地金繩界其道七寶
雜色樹常有華果實彼國諸菩薩志念常堅固

神通波羅蜜皆已悉具足於無數佛所善學菩
薩道如是等大士華光佛所化佛爲王子時棄
國捨世榮於最末後身出家成佛道華光佛住
世壽十二小劫其國人民衆壽命八小劫佛滅
度之後正法住於世三十二小劫廣度諸衆生
正法滅盡已像法三十二舍利廣流布天人普
供養華光佛所爲其事皆如其兩足聖尊最
勝無倫匹彼卽是汝身宜應自欣慶

此重頌授記之事也。頌言華光亦爲王子而

出家者本之燈明智勝。卽我釋尊皆從王子
而出家。是知無有一佛。不是轉識成智而證
三身者。故云棄國捨榮。豈有天生彌勒。自然
釋迦。不修而成者耶。

爾時四部衆比丘比丘尼優婆塞優婆夷天龍
夜叉乾闥婆阿脩羅迦樓羅緊那羅摩睺羅伽
等大衆見舍利弗於佛前受阿耨多羅三藐三
菩提。記心大歡喜踊躍無量。各各脫身所著上
衣。以供養佛。釋提桓因梵天王等與無數天子

亦以天妙衣天曼陀羅華摩訶曼陀羅華等供
養於佛。所散天衣住虛空中。而自迴轉。諸天伎
樂百千萬種於虛空中。一時俱作。雨衆天華。而
作是言。佛昔於波羅柰初轉法輪。今乃復轉無
上最大法輪。爾時諸天子欲重宣此義。而說偈
言。

昔於波羅柰轉四諦法輪。分別說諸法。五衆之
生滅。今復轉最妙無上大法輪。是法甚深奧。少
有能信者。我等從昔來。數聞世尊說。未曾聞如

法華通論 卷三
是深妙之上法世尊說是法我等皆隨喜大智
舍利弗今得受尊記我等亦如是必當得作佛
於一切世間最尊無有上佛道叵思議方便隨
宜說我所有福業今世若過世及見佛功德盡
廻向佛道

此敘在會四衆八部因見身子受記各各皆
生歡喜也以如來住世爲四衆八部之依皈
一向隨佛聞法未知究竟如諸將從漢人人
思得尺寸之封也始見如來放光現瑞皆已

騰疑不知所爲何事且因文殊已知將說法
華經矣及出定說經但歎二智甚深謂一切
天人三乘所不能知此則更生疑悶也然身
子爲佛之長子乃四衆天人之所敬仰者始
且驚疑終竟領悟而得授記成佛故如長者
得子而委付家業則眷屬親族皆有所依歸
故四衆歡喜而身解脫所以脫衣供佛從此
人人自知必當作佛故盡發廻向之心也此
法王御世與諸魔共戰今賞一功而法界之

法華通論 卷二
家國定矣。豈小緣哉。世尊出世爲一大事。因緣卽今已遂。本懷尚有未信之徒。自可一次第而舉。故向下之談。如建瓴之勢。聞者望風而靡。不勞餘力矣。

爾時舍利弗白佛言。世尊。我今無復疑悔。親於佛前得受阿耨多羅三藐三菩提記。是諸千二百心自在者。昔住學地。佛常教化。言我法能離生老病死。究竟涅槃。是學無學人。亦各自以離我見及有無見等。謂得涅槃。而今於世尊前聞

所未聞。皆墮疑惑。善哉。世尊。願爲四衆說其因緣。令離疑悔。

此身子自慶領悟得記。復爲未悟請佛決疑。所以發起喻說也。

爾時佛告舍利弗。我先不言諸佛世尊。以種種因緣譬喻。言辭方便。說法皆爲阿耨多羅三藐三菩提耶。是諸所說。皆爲化菩薩。故然舍利弗。今當復以譬喻。更明此義。諸有智者。以譬喻得

解

此正開喻說也。謂先前以種種因緣譬喻言
辭皆爲顯發一乘無上菩提。教菩薩法。明言
我法無有二乘。則人人皆當知有成佛之分
矣。又何疑耶。然既於因緣不悟。則更當譬喻
以發明之。前說一大事因緣所以難明者。以
方便品未直說舍那現應化身將一乘法分
別說三。是則明言有法報身佛在焉。而二乘
一向但認釋迦應身之佛。熬遊三界穢濁之
境。執著已證二乘之果。不復知有向上事。雖

前明告現身三界三七思惟之事。而聲聞等
解猶有所未解。故當更以譬喻總明現身三
界之因緣耳。故後喻說甚明。

舍利弗。若國邑聚落有大長者。其年衰邁。財富
無量。多有田宅。及諸僮僕。其家廣大。唯有一門。
多諸人衆。一百二百乃至五百人。止住其中。堂
閣朽故。牆壁墮落。柱根腐敗。梁棟傾危。周匝俱
時欬然。火起焚燒。舍宅長者諸子。若二十或
至三十。在此宅中。長者見是大火。從四面起。卽

法華通義 卷三
大驚怖而作是念我雖能於此所燒之門安隱
得出而諸子等於火宅內樂著嬉戲不覺不知
不驚不怖火來逼身苦痛切已心不厭患無求
出意

此正陳三界無安猶如火宅爲喻說也言娑
婆世界居萃藏世界海中但一塵毛若國邑
中之一聚落村舍耳長者則指從報垂化之
主佛也年邁喻法報冥一自受法樂之地如
長者年邁安恬寂靜之時也以修進位中比

壯志功勳若忘功罷業比年老心閒而無事
也財富等喻實智僮僕喻權智以供任使宗
門所謂奴兒婢子邊事也其家廣大唯有一
門喻一乘佛知見所謂十方諸如來一道出
生死也三界具有五道衆生故云五百人止
住其中堂閣朽故喻三界衆生依正二報無
常敗壞之相也衆生清涼心中無故而起五
欲之火故曰欬然長者諸子喻三善道言五
道衆生堪受化者什一而已長者見是大火

法華通義 卷三
下喻以佛眼觀見六道衆生貧窮無福慧故
不覺不知以苦捨苦故無求出意佛見衆生
之苦如此所以興起大悲濟度之心也
舍利弗是長者作是思惟我身手有力當以木
祿若以几案從舍出之復更思惟是舍唯有一
門而復陘小諸子幼稚未有所識戀著戲處或
當墮落爲火所燒我當爲說怖畏之事此舍已
燒宜時疾出無令爲火之所燒害作是念已如
所思惟具告諸子汝等速出父雖憐愍善言誘

諭而諸子等樂著嬉戲不宥信受不驚不畏了
無出心亦復不知何者是火何者爲舍云何爲
失但東西走戲視父而已

此下喻三七思惟依實施權之意也身手有
力喻佛具有神力智慧力也衣祿几案衣祿
若此方之衣襟可以提取几案如此方之椅
轎可以提挈喻攝受也一門喻一乘法被機
不廣故云狹小所謂若我但以神力及智慧
力捨於方便讚如來知見力無所畏者衆生

法華通義 卷一
不能以是得度。以一乘法信之者希。則得度者寡。意要施權令衆生自信。自宥則受化者衆矣。此喻始坐道場。初七思惟。若但讚佛乘。衆生沒在苦不能信是法故。二七思惟。依實施權。故云一門狹小。意要別設方便也。佛以神力攝授提挈衆生。而不得必欲自信自宥者。正謂把手他人行不得。爲人自宥乃方親耳。若人不信不宥。則諸佛所不化矣。諸子幼稚。下喻衆生。無知難化。將設方便。先陳其害。

使知怖畏。乃宥自出。此三轉之初。先示三界之苦狀也。父雖下喻衆生。迷惑不受教。不求大勢佛。及以斷苦法。故如視父而已。了無親信之心也。

爾時長者卽作是念。此舍已爲大火所燒。我及諸子若不時出。必爲所焚。我今當設方便。令諸子等得免斯害。父知諸子先心。各有所好。種種珍玩奇異之物。情必樂著。而告之言。汝等所可玩好。希有難得。汝若不取。後必憂悔。如此種種。

羊車鹿車牛車今在門外可以遊戲汝等於此
火宅宜速出來隨汝所欲皆當與汝爾時諸子
聞父所說珍玩之物適其願故心各勇銳互相
推排競共馳走爭出火宅

此言長者救焚喻佛三七思惟現身三界初
說三乘也。然佛已出三界而言同及諸子必
爲所焚者喻佛性之在衆生五欲煩惱之中
若不以方便開顯必當斷滅佛種故如同焚
也。先心所好者喻衆生以著諸欲而墮生死

今亦以種種所欲之物而引導之故說三乘
種種方便所謂先以欲鈎牽後令人佛慧也
互相推排爭出火宅者喻佛居鹿苑諸外道
等如舍利弗各領徒衆而爭歸於佛也。推排
喻諸弟子初心捨邪從正之狀。是足以見三
乘之權有力也

是時長者見諸子等安隱得出皆於四衢道中
露地而坐無復障礙其心泰然歡喜踊躍時諸
子等各白父言父先所許玩好之具羊車鹿車

法華通義 卷二
牛車願時。賜與舍利弗。爾時長者各賜諸子等
一大車。其車高廣。衆寶莊校。周匝欄楯。四面懸
鈴。又於其上。張設幃蓋。亦以珍奇雜寶。而嚴飾
之。寶繩交絡。垂諸華纓。重敷婉婉。安置丹枕。駕
以白牛。膚色充潔。形體姝好。有大筋力。行步平
正。其疾如風。又多僕從。而侍衛之。所以者何。是
大長者。財富無量。種種諸藏。悉皆充溢。而作是
念。我財物無極。不應以下劣小車。與諸子等。今
此幼童。皆是吾子。愛無偏黨。我有如是七寶大

車。其數無量。應當等心。各各與之。不宜差別。所
以者何。以我此物。周給一國。猶尚不匱。何況諸
子是時。諸子各乘大車。得未曾有。非本所望。

此喻廢三顯一之意也。長者見諸子得出其
心歡喜等者。喻諸小乘。因聞佛教。而出三界
證四諦果。無復生死煩惱之障礙。故如露地
而坐。如諸子心安。而父亦踴躍歡喜。正如子
病而父亦病。子安而父亦安。佛以同體大悲
攝化衆生意。見於此矣。時諸子等。就父索車。

法華通義 卷二
喻聲聞執權果以爲實也。長者各賜一大車等者。喻今說法華各授成佛之記。名爲等賜。以顯平等佛性也。其車高廣。喻一乘之廣大。乘寶莊校等者。顯長者之財富無量。喻一乘二智之甚深。所謂方便。知見波羅蜜皆已具足。莊校華纓。所以飾外。喻方便權智。婉遊丹枕。所以飾內。喻實智法樂。駕以白牛。喻大乘法。唯大根衆生堪荷負也。膚色等。喻大根之純淨。大力喻堪荷負。行步平正。喻正行。其疾

如風喻根利。多僕從。喻多方便自慰也。所以者。何下。自釋等。賜大車之意。謂長者財富無量。不應自厚而薄於子。正喻佛自住大乘。若以小乘法。則爲墮慳貪也。今此下結一視諸子。喻佛觀三界衆生。如一子地。故愛無偏黨也。所以者。何下。喻佛無盡藏。既已與人。已愈有。故云猶尚不匱。諸子各乘大車等。喻今二乘成佛。實出望外也。

舍利弗於汝意云。何是長者等。與諸子珍寶大

車寧有虛妄。不舍利弗言不也。世尊是長者。仁
令諸子得免火難。全其軀命。非爲虛妄。何以故。
若全身命。便爲已得玩好之具。況復方便於彼
火宅。而拔濟之。世尊若是長者。乃至不與最小
一車。猶不虛妄。何以故。是長者先作是意。我以
方便。令子得出。以是因緣。無虛妄也。何況長者
自知財富無量。欲饒益諸子。等與大車。佛告舍
利弗。善哉善哉。如汝所言。

此佛審身子長者。許三而賜一。爲虛妄不者。

以三車本無喻。三乘假設。唯有一乘是實也。
身子所言不虛者。意謂身命可寶。尤貴於物
也。全軀保命。已得弘多。況免火宅之難乎。卽
不與最小一車。猶不虛妄。以長者本意假設
爲誘引。故況今等賜一大寶車。已出望外。豈
虛妄耶。是則身子已信三乘爲假。一乘是實。
則諸大弟子。可因譬喻而悟矣。故佛讚言善
哉善哉。善其契會佛心也。

舍利弗如來亦復如是。則爲一切世間之父於

諸怖畏衰惱憂患無明暗蔽永盡無餘而悉成
就無量知見力無所畏有大神力及智慧力具
足方便智慧波羅蜜大慈大悲常無懈倦恒求
善事利益一切而生三界朽故火宅爲度衆生
生老病死憂悲苦惱愚癡暗蔽三毒之火教化
令得阿耨多羅三藐三菩提見諸衆生爲生老
病死憂悲苦惱之所燒煮亦以五欲財利故受
種種苦又以貪著追求故現受衆苦後受地獄
畜生餓鬼之苦若生天上及在人間貧窮困苦

愛別離苦怨憎會苦如是等種種諸苦衆生沒
在其中歡喜遊戲不覺不知不驚不怖亦不生
厭不求解脫於此三界火宅東西馳走雖遭大
苦不以爲患舍利弗佛見此已便作是念我爲
衆生之父應拔其苦難與無量無邊佛智慧樂
令其遊戲舍利弗如來復作是念若我但以神
力及智慧力捨於方便爲諸衆生讚如來知見
力無所畏者衆生不能以是得度所以者何是
諸衆生未免生老病死憂悲苦惱而爲三界火

法華通義 卷二
宅所燒何由能解佛之智慧舍利弗如彼長者
雖復身手有力而不用之但以慇勤方便勉濟
諸子火宅之難然後各與珍寶大車如來亦復
如是雖有力無所畏而不用之但以智慧方便
於三界火宅拔濟衆生爲說三乘聲聞辟支佛
佛乘而作是言汝等莫得樂住三界火宅勿貪
麤弊色聲香味觸也若貪著生愛則爲所燒汝
速出三界當得三乘聲聞辟支佛佛乘我今爲
汝保任此事終不虛也汝等但當勤修精進如

來以是方便誘進衆生復作是言汝等當知此
三乘法皆是聖所稱歎自在無繫無所依求乘
是三乘以無漏根力覺道禪定解脫三昧等而
自娛樂便得無量安隱快樂舍利弗若有衆生
內有智性從佛世尊聞法信受慇勤精進欲速
出三界自求涅槃是名聲聞乘如彼諸子爲求
羊車出於火宅若有衆生從佛世尊聞法信受
慇勤精進求自然慧樂獨善寂深知諸法因緣
是名辟支佛乘如彼諸子爲求鹿車出於火宅

法華通義 卷二
若有衆生從佛世尊聞法信受勤修精進求一切智佛智自然智無師智如來知見力無所畏愍念安樂無量衆生利益天人度脫一切是名大乘菩薩求此乘故名爲摩訶薩如彼諸子爲求牛車出於火宅舍利弗如彼長者見諸子等安隱得出火宅到無畏處自惟財富無量等以大車而賜諸子如來亦復如是爲一切衆生之父若見無量億千衆生以佛敎門出三界苦怖畏險道得涅槃樂如來爾時便作是念我有無

量無邊智慧力無畏等諸佛法藏是諸衆生皆是我子等與大乘不令人獨得滅度皆以如來滅度而滅度之是諸衆生脫三界者悉與諸佛禪定解脫等娛樂之具皆是一相一種聖所稱歎能生淨妙第一之樂舍利弗如彼長者初以三車誘引諸子然後但與大車寶物莊嚴安隱第一然彼長者無虛妄之咎如來亦復如是無有虛妄初說三乘引導衆生然後但以大乘而度脫之何以故如來有無量智慧力無所畏

諸法之藏能與一切衆生大乘之法但不盡能
受舍利弗以是因緣當知諸佛方便力故於一
佛乘分別說三

此以法合喻也。如來以一子地視衆生故爲
世間父。故喻長者宅主。而生三界下此合其
家廣大以成就無量知見等正。如長者大富
也。本有救焚之心。故生三界與民同患教化
衆生。令至安隱之地。故欲令得菩提也。見諸
衆生下合宅舍四面火起。諸子耽湏嬉戲不

以爲患也。舍利弗下合長者救焚無策。是舍
唯有一門。而復狹小。思設濟度之方也。若我
但以神力等。以至衆生不能以是得度。正合
一門狹小之義也。所以者何。下合諸子癡迷
思設方便權宜也。如彼長者下合假設三車
誘引諸子本心。在後等賜一大車也。而作是
言下。合善言誘喻諸子也。汝速出三界下。合
長者許門外三車。可以遊戲快樂也。若有衆
生下。合諸子出宅就父索車也。喻中許三原

法華通義 卷二
無三法中許三各取證。意使三乘之人。知昔
果是權。支雖法喻不齊。而意在開權顯實也。
此一段。通明三乘之權合。諸子聞許三車。而
爭出火宅也。如彼長者下將顯今實合長者
等賜一大白牛車。重牒其喻以法合也。如來
亦復如是。正顯今實諸三乘人。一一授記成
佛也。故云。皆以如來滅度而滅度之。是諸衆
生下合等賜諸子。一大寶車。寶物莊校。無物
不備。正喻法界莊嚴萬德具足也。淨妙第一

之樂。正合婉筵丹枕。所謂實智自受法樂也。
如彼長者下重顯初許三車。不妄正合今座
權立實諦。信今實不虛也。如來亦復如是。下
總結喻說。以明開權顯實之意。諸佛所證法
藏甚深。靡不竭施衆生。但法大機小。不能盡
受。所以將一乘法。分別說三者此也。

佛欲重宣此義。而說偈言。

譬如長者有一大宅。其宅久故。而復頓弊。堂舍
高危。柱根摧朽。梁棟傾斜。基陛墮毀。牆壁圯圯。

泥塗地落覆苦亂墜椽椽差脫周障屈曲雜穢
充徧有五百人止住其中

此頌喻佛爲三界依歸故如宅主其宅久故
下十二句三界喻衆生同業所感之依報堂
舍通喻衆生別業所感之正報高危等喻無
常敗壞之狀久故謂從來如此非特今也有
五百人止住其中則五道衆生皆不免無常
生老病死之苦也

鴟梟鵂鶩烏鵲鳩鴛蛇蝮蝎蜈蚣蚰蜒守宮

百足鼯狸鼯鼠諸惡蟲輩交橫馳走屎尿臭處
不淨流溢蟻蝮諸蟲而集其上狐狼野干咀嚼
踐蹋齧死屍骨肉狼藉由是群狗競來搏撮
饑羸悵惶處處求食鬪諍搥掣嗥嗥吠其舍
恐怖變狀如是處處皆有魑魅魍魎夜叉惡鬼
食噉人肉毒蟲之屬諸惡禽獸孚乳產生各自
藏護夜叉競來爭取食之食之旣飽惡心轉熾
鬪諍之聲甚可怖畏鳩槃荼鬼蹲踞土埵或時
離地一尺二尺往返遊行縱逸嬉戲捉狗兩足

撲令失聲以脚加頸怖狗自樂復有諸鬼其身
長大裸形黑瘦常住其中發大惡聲叫呼求食
復有諸鬼其咽如針復有諸鬼首如牛頭或食
人肉或復噉狗頭髮鬚亂殘害兇險饑渴所逼
叫喚馳走夜叉餓鬼諸惡鳥獸饑急四向闚看
窻牖如是諸難恐畏無量是朽故宅屬于一人
其人近出未久之間於後宅舍忽然火起四面
一時其燄俱熾棟梁椽柱爆聲震裂摧折墮落
墻壁崩倒諸鬼神等揚聲大叫鵬鷲諸鳥鳩槃

荼等周悼惶怖不能自出惡獸毒蟲藏窟孔穴
昆舍閻鬼亦住其中薄福德故爲火所逼共相
殘害飲血噉肉野干之屬並已前死諸大惡獸
競來食噉臭烟蓬焯四面充塞蜈蚣蚰蜒毒蛇
之類爲火所燒爭走出穴鳩槃茶鬼隨取而食
又諸餓鬼頭上火然饑渴熱惱周悼悶走其宅
如是甚可怖畏毒害火災衆難非一

此詳喻三界衆生惡業因果一一備陳其情
狀也上言是朽宅中有五百人而言子者一

法華通義 卷三
十、二十乃至三十。蓋言五趣衆生堪受化者
不過什一。特指人天善類而言。其不受化造
惡者衆矣。今總言惡業衆生。肆貪嗔癡。諸煩
惱濁。種種顛倒習氣之不一。故感三途苦果
之不同。甚可畏也。喻文一百三十二句。總顯
三途之因果。皆由人中惡習情想所召之不
同。蓋舉果以驗因。言雖稱喻。其實是法。如楞
嚴習因交報可徵矣。前譬如長者下十六句
總喻二界衆生。鳴臯鵬鷺下二十四句別言

畜生之因果也。畜有飛走蠢輒諸蟲受形巨
細之不同。或媮習以恣貪。或嗔習以肆毒。其
惡均也。三毒肆發而無忌。故云交橫馳走。男
女身形種種不淨。屎尿流溢。猶然貪愛執著
而不捨。誠若蜣螂之集糞壤。狐狼之齧死屍。
貪得不已。若群狗悻惶而求食。爭競不休。擅
擊而發嗥吠之惡聲。此畜類之因果。皆三毒
之顯現。故云其舍恐怖變狀如是。槩言畜生
之情狀也。處處下別顯鬼趣之因果也。言處

處皆有者無一衆生不以魑魅魍魎之心而爲鬼趣之因也。夜叉云苦活鬼言食人肉者由昔人中惡業深重損法身傷慧命斷絕善根故墮鬼中以苦自活而以人肉爲食者此由人而入鬼趣者也。三毒相滋故云產生執恠不捨故云藏護此由畜生復入鬼趣之苦果故夜叉爭取而食之此由畜而入鬼趣者也。以畜類旣多而鬼趣亦盛故食飽而惡心轉熾宿習現行兩相交攻故鬪諍之聲甚可

怖畏也。鳩槃荼云可畏鬼無常殺鬼也。或時離地等者或一念之善而感人天尋卽墮落故云往返遊行言嬉戲者所謂在餘惡道如遊園觀也。鬼取其畜畜畏死而鬼快意故云怖狗自樂畜多種而獨指狗者以狗習近於人貪嗔盛故復有諸鬼下單言餓鬼之狀也。身大裸形言其貌惡常住其中言其時長一墮此中經五百劫不聞漿水之名故云叫喚求食鼓腹針咽首如牛頭言其形惡食人噉

法苑珠林卷之二
一
三
狗言從人及畜皆墮此類也。頭髮鬣亂言狀惡殘害兇險。言性惡皆宿習然也。叫喚馳走則苦逼所致。夜叉下通結鬼畜皆有求出之心。而無門可出。故但闚看牕牖而結云。如是諸難恐畏無量。皆三毒之實報。是皆舉果以明因重在因也。以二類皆有互相造業之狀。故下言地獄則通重其果。是朽故宅下通顯地獄之因果也。以地獄苦逼二類但受而不能造。故將明地獄而重舉宅主者意。喻三界

朽宅唯佛能化。故云屬於一人。三界衆生由三毒猛熾。故云忽然火起。無常敗壞一至則無論鬼畜皆歸地獄。故宅被火焚而諸鬼大叫。諸蟲悼惶不能自出。所謂生不修福死歸苦處也。惡獸毒蟲始則交橫肆毒。今則悶絕無知。故云藏窟孔穴地獄苦極之狀也。毘舍闍云惱害鬼。言煩惱至此亦無所施。故云亦住其中。是皆生無福德。故爲火逼入於地獄。寃對相尋。故云共相殘害也。野干之屬始則

恣貪嗔以齧他人之死屍。今則自死其屍。又爲諸大惡獸之所食也。地獄盡皆業火燒然。故臭煙充塞昏無所見也。蜈蚣毒蛇始則逞毒以傷人。今被燒而爭出。又爲惡鬼所取食。此則從地獄出復墮畜生之中矣。餓鬼本因嬌習所招。以生爲欲火。死爲業火。故頭上火然。無飲無食。故饑渴悶走而不能出。此三毒惡業所歸之極處也。故總結云。其舍如是。甚可怖畏。衆難非一也。甚矣衆生癡迷。三毒熾

然。故感三途之劇報。皆迷一心所致。故知三途惡事皆唯心變現之境也。佛始以火宅喻三界。舉其大者而言之。其中諸惡禽獸及諸惡鬼。皆三惡道中之實事。如楞嚴所謂內分之因果也。言雖爲喻。其實卽果。以明因非別取分外之物爲喻也。然衆生三毒而爲三途之因。形雖未化。而心與之俱往矣。古釋配合於法。雖詳。不若尅就因果之實事爲切。故不暇一一。今但略通大義。若欲具明。請觀別

解

是時宅主在門外立聞有人言汝諸子等先因遊戲來入此宅稚小無知歡娛樂著長者聞已驚入火宅方宜救濟令無燒害告諭諸子說衆患難惡鬼毒蟲災火蔓延衆苦次第相續不絕毒蛇虻蝮及諸夜叉鳩槃荼鬼野干狐狗鴟鷲鴟梟百足之屬饑渴惱急甚可怖畏此苦難處況復大火諸子無知雖聞父誨猶故樂著嬉戲不已是時長者而作是念諸子如此益我愁惱

今此舍宅無一可樂而諸子等耽酒嬉戲不受我教將爲火害卽便思惟設諸方便告諸子等我有種種珍玩之具妙寶好車羊車鹿車大牛之車今在門外汝等出來吾爲汝等造作此車隨意所樂可以遊戲諸子聞說如此諸車卽時奔競馳走而出到於空地離諸苦難長者見子得出火宅住於四衢坐師子座而自慶言我今快樂此諸子等生育甚難愚小無知而入險宅多諸毒蟲魍魎可畏大火猛燄四面俱起而此

諸子貪樂嬉戲我已救之令得脫難是故諸人
我今快樂爾時諸子知父安坐皆詣父所而白
父言願賜我等三種寶車如前所許諸子出來
當以三車隨汝所欲今正是時惟垂給與長者
大富庫藏衆多金銀琉璃碑礪碼礪以衆寶物
造諸大車莊校嚴飾周巾欄楯四面懸鈴金繩
交絡真珠羅網張施其上金華諸瓔處處垂下
衆綵雜飾周巾圍繞柔輦繪續以爲茵褥上妙
細氈價直千億鮮白淨潔以覆其上有大白牛

肥壯多力形體姝好以駕寶車多諸儻從而侍
衛之以是妙車等賜諸子諸子是時歡喜踊躍
乘是寶車遊於四方嬉戲快樂自在無礙

此頌長者救焚也宅主在門外立譬佛獨出
三界也聞有人言譬三七思惟諸天梵王請
轉法輪也先因遊戲者謂三界衆生始因無
明縱浪煩惱而墮三界初非有心要墮故云
嬉戲長者聞已下四句喻佛現身三界與民
同患也告諭諸子十六句喻將說三乘先示

生死苦患之相也。諸子下四句頌諸子了無
出心喻衆生雖聞佛教而不信也。是時長者
下二十四句喻佛初說三乘法名引導也。諸
子聞說下六句。諸子聞說三車而爭出宅喻
衆生依佛教法而出三界也。長者見子下二
十句喻衆生離苦而慈父樂也。生育甚難。言
人身不易得也。爾時諸子下十二句喻三乘
執權當實也。長者大富下三十句喻今獨說
一乘法也。寶物莊嚴喻一乘法法萬德皆

備也。諸子是時下六句喻今聞法歡喜也。

告舍利弗我亦如是衆聖中尊世間之父一切
衆生皆是吾子深著世樂無有慧心三界無安
猶如火宅衆苦充滿甚可怖畏常有生老病死
憂患如是等火熾然不息如來已離三界火宅
寂然閒居安處林野今此三界皆是我有其中
衆生悉是吾子而今此處多諸患難唯我一人
能爲救護雖復教詔而不信受於諸欲染貪著
深故以是方便爲說三乘令諸衆生知三界苦

法華通義 卷二
開示演說出世間道是諸子等若心決定具足
三明及六神通有得緣覺不退菩薩汝舍利弗
我爲衆生以此譬喻說一佛乘汝等若能信受
是語一切皆當成得佛道

此頌以法合喻也。合上十節一一可知。總之
皆爲捨權就實也。

是乘微妙清淨第一於諸世間爲無有上佛所
悅可一切衆生所應稱讚供養禮拜無量億千
諸力解脫禪定智慧及佛餘法得如是乘令諸
子等日夜劫數常得遊戲與諸菩薩及聲聞衆
乘此寶乘直至道場以是因緣十方諦求更無
餘乘除佛方便

此頌廣讚一乘之德也。佛所悅可言一乘乃
佛所樂說。若三乘則原非本心。日夜劫數者
謂一入妙法則久近情忘以法自娛。無論大
小。直至成佛而不退也。故結之以是因緣更
無餘乘。

告舍利弗汝諸人等皆是吾子我則是父汝等

累劫衆苦所燒我皆濟拔令出三界我雖先說
汝等滅度但盡生死而實不滅今所應作唯佛
智慧若有菩薩於是衆中能一心聽諸佛實法
諸佛世尊雖以方便所化衆生皆是菩薩若人
小智深著愛欲爲此等故說於苦諦衆生心喜
得未曾有佛說苦諦真實無異若有衆生不知
苦本深著苦因不能躉捨爲是等故方便說道
諸苦所因貪欲爲本若滅貪欲無所依止滅盡
諸苦名第三諦爲滅諦故修行於道離諸苦縛

名得解脫是人於何而得解脫但離虛妄名爲
解脫其實未得一切解脫佛說是人未實滅度
斯人未得無上道故我意不欲令至滅度我爲
法王於法自在安隱衆生故現於世

此頌重明佛爲救衆生出世應機說法頌我
爲一切世間之父等意也皆是吾子言三界
衆生爲佛一子地未有父不憐子者因見衆
生長劫燒然故興悲出世拔濟也以衆生根
小故先設權乘雖出生死其實非真滅度也

法苑珠林卷一
三
今說佛慧唯是實法。若昔所化有衆生聞而生信者。則皆是菩薩。俱有成佛之分矣。若人小智下。明昔權所以言苦集滅道四諦之法。所以爲權者。以小智衆生深著愛欲。故爲先說苦諦以警之。使知苦而生厭。諦者真實而無異也。衆生知苦而不知苦本。故爲說貪欲爲苦本。使知斷集而滅苦也。若滅貪欲。則苦無所依。使知修道而證滅也。以離苦名爲解脫耳。是人於何下十二句言滅非真滅。所言

解脫者。但離虛妄分段生死名爲解脫。其實未得一切解脫。以有變易生死尚存。故說此人未實滅度。以未得無上大涅槃。故所以爲權佛之本意。只要衆生成佛。豈以是爲足哉。但大小三乘皆應機之法也。然小法非真。而如來亦說者。以我爲法王。於法自在。隨我所說。無非祇爲安隱衆生。故現於世耳。

汝舍利弗。我此法印爲欲利益世間。故說在所遊方。勿妄宣傳。

法華通義 卷二
此頌申明今說大法。深誠身子擇機宣傳也。誠其勿妄者以我今日所說名爲法印。佛所說法以實相印印定諸法。故使魔外不得混易。此法專爲利益世間故說。但須擇機。苟非其人。則甚勿妄傳也。

若有聞者隨喜頂受。當知是人阿惟越致。若有信受此經法者。是人已曾見過去佛恭敬供養。亦聞是法。若人有能信汝所說。則爲見我。亦見於汝。及比丘僧。并諸菩薩。斯法華經爲深智說。

淺識聞之。迷惑不解。一切聲聞及辟支佛。於此經中。力所不及。汝舍利弗。尚於此經。以信得人。況餘聲聞。其餘聲聞。信佛語。故隨順此經。非已智分。

此頌正明擇機也。若有聞而隨喜頂受者。是人則爲不退大菩薩矣。卽無大機。但有聞而能信者。此亦難得。亦可爲說。若有信受下十。二句言信機也。以能信此法者。則已曾供佛。聞法福慧深厚。若能信汝。卽爲見我。及比丘。

菩薩。如在今日靈山一會。此堪能荷負。故可爲說耳。斯法下八句。言此大法爲深智說。非淺識所及也。汝舍下八句。言不及所以。且汝智慧第一。尙以信得入。況餘聲聞信語。而不信心者乎。所以非已智分也。

又舍利弗。憍慢懈怠。計我見者。莫說此經。凡夫淺識深著五欲。聞不能解。亦勿爲說。若人不信毀謗此經。則斷一切世間佛種。或復輦感而懷疑惑。汝當聽說此人罪報。若佛在世。若滅度後。

其有誹謗如斯經典。見有讀誦書持經者。輕賤憎嫉。而懷結恨。此人罪報。汝今復聽。

此頌誠非機勿傳也。此法甚深難信難解。卽佛住世親爲衆說。猶且待機四十年。未敢速說。及說尚有增上慢人。况佛滅後。身子小乘。縱善說誰能信之乎。其在同儕多有憍慢。自高及懈怠寡聞者。亦有我見自是者。此三等。人皆不可說。說亦不信。返生誹謗。不若不說爲得耳。其在凡夫無智。況深著五欲。卽聞亦

不解說之何益。故誠勿妄宣傳也。非機不信。不唯無益。而返害之。以此經乃人人佛性種子也。凡不信者。定生誹謗。若謗此經。則斷一切世間佛種矣。縱不誹謗。或舉感而厭聽。懷疑而不決。皆不信之儔也。言有害者。以取三途之罪報也。汝今復聽吾今爲汝。一一說之。其人命終。入阿鼻獄。具足一劫。劫盡更生。如是展轉至無數劫。

此頌歷言謗經之罪。以警不信之儔也。其有謗經之罪。必先墮地獄。一入地獄。而時長難出者。以佛性種子。名常住真心。既背此心。而永劫沉淪。常在地獄。固其所也。

從地獄出。當墮畜生。若狗野干。其形頹瘦。薰羶疥癩。人所觸。又復爲人之所惡。賤常困饑渴。骨肉枯竭。生受楚毒。死被瓦石。斷佛種。故受斯罪報。若作駝。或生驢。中身常負重。加諸杖撻。但念水莫餘。無所知。謗斯經。故獲罪如是。有作野干。來入聚落。身體疥癩。又無一目。爲諸童子。

法華通義 卷二
之所打擲受諸苦痛或時致死於此死已更受
鱗身其形長大五百由旬躡駮無足宛轉腹行
爲諸小蟲之所啣食晝夜受苦無有休息謗斯
經故獲罪如是

此頌明畜生之報也。畜有多種隨業受形。狗
性苟且以失正信故墮狗。以多疑故墮野干。
以損法身故形瘦而黠癩。以不敬三寶故人
惡賤以不餐采法味故困饑渴肉枯竭。以永
殞善根故生受楚毒死被瓦石皆斷佛種性。

之罪報也。上乃畜之眇小者。若作駝驢皆力
大而能負重者。以煩惱癡重故常負重。而更
受杖捶。以性執愚故但念水草餘無所知。皆
謗此經所感之報也。或因邪見而作野干。又
無一目。以生不知所敬故被童子打擲而至
死也。捨此而更受鱗身長大而無足。蓋嗔癡
之劇報也。受小蟲啣食之苦者。以多口誹謗
故受苦不休。是皆謗此經之罪報也。

若得爲人諸根暗鈍矧陋癡慧盲聾背偃有所

法苑珠林卷一
言說人不信受口氣常臭臙魅所著貧窮下賤
爲人所使多病病瘦無所依怙雖親附人人不
枉意若有所得尋復忘失若修醫道順方治病
更增他疾或復致死若自有病無人救療設服
良藥而復增劇若他反逆抄劫竊盜如是等罪
橫罹其殃如斯罪人永不見佛衆聖之王說法
教化如斯罪人常生難處狂聾心亂永不聞法
於無數劫如恒河沙生輒聾瘖諸根不具常處
地獄如遊園觀在餘惡道如已舍宅駝驢猪狗

是其行處謗斯經故獲罪如是若得爲人聾耳
瘡癩貧窮諸衰以自莊嚴水腫乾瘠疥癩癰疽
如是等病以爲衣服身常臭處垢穢不淨深著
我見增益瞋恚淫欲熾盛不擇禽獸謗斯經故
獲罪如是告舍利弗謗斯經者若說其罪窮劫
不盡以是因緣我故語汝無智人中莫說此經
此頌言人中之報也若得爲人者言從地獄
畜生幸出而爲人也生無智慧故諸根暗鈍
不敬三尊故挫陋癡慧爲人短小輕蔑人故

以生無聞見故感盲聾。以我慢自高故感背
偃。以謗法故人說不信。口出惡言故口氣常
臭。邪想固蔽故鬼魅所著。以生無法則故貧
窮下賤爲人所使。以不餐采法藥故多病瘠
瘦。以遠離慈父故無所依怙。雖親人。人不枉
意也。以無正念故所得易忘。以性習顛倒故
修醫順方而更增他疾。自病遇藥而返增劇。
以非理加謗故他逆而橫擢其殃。上皆人中
之報也。以永殞善根故永不見佛聞法。長劫

聾啞諸根不具。纔由三途而出爲人。人中業
感旋卽復入三途。故常處地獄。如遊園觀。在
餘惡道如已舍宅駝驢猪狗。是其行處。皆謗
經之業招感也。若得爲人。下十六句言先從
三途出而爲人。由人而復入三途。今則又從
三途出而爲人。所謂如遊園觀也。旣得爲人。
猶然夙業難消。仍復盲聾等爲莊嚴。水腫等
惡病爲衣服。言苦不離身也。身臭不淨之如
此矣。日又我見而不悛。嗔恚而不息。熾熾而

法華通義 卷一
不擇如此安能脫苦趣。何以停寢劇報之迅
輪乎。是皆謗經之罪報也。告舍利下總結非
機有此多損說不能盡。以是因緣故誠汝無
智人中莫說此經也。

若有利根智慧明了多聞強識求佛道者如是
之人乃可爲說若人曾見億百千佛植諸善本
深心堅固如是之人乃可爲說若人精進常修
慈心不惜身命乃可爲說若人恭敬無有異心
離諸凡愚獨處山澤如是之人乃可爲說又舍

利弗若見有人捨惡知識親近善友如是之人
乃可爲說若見佛子持戒清凈如淨明珠求大
乘經如是之人乃可爲說若人無瞋質直柔軟
常愍一切恭敬諸佛如是之人乃可爲說復有
佛子於大衆中以清淨心種種因緣譬喻言辭
說法無礙如是之人乃可爲說若有比丘爲一
切智四方求法合掌頂受但樂受持大乘經典
乃至不受餘經一偈如是之人乃可爲說如人
至心求佛舍利如是求經得已頂受其人不復

法華通義 卷二
志求餘經亦未曾念外道典籍如是之人乃可
爲說告舍利弗我說是相求佛道者窮劫不盡
如是等人則能信解汝當爲說妙法華經

此頌正言上根可說之人也如上所說。一
有人如此真法器也。乃可爲說。否則失其人
矣。安可使慧命不續乎。求佛舍利。則精誠之
至也。昔康僧會西域望見震旦有五色光燭
天。知爲佛舍利。尋光而來。至江東佛陀里結
茅設像行道。或奏吳主孫權以爲異。主詔問

言爲佛弟子。問佛何在。云佛已滅。有舍利可
驗。問可得見乎。云精誠求之。乃可得也。因命
立壇求之。不應以死。始期七日不應。改期七
日又不應。再期終不應。會乃禱曰。余死不惜。
則此土衆生終絕佛法之緣也。於是精誠益
篤。中夜極力大呼。佛號三聲。徧身血汗迸流。
於是忽聞瓶中鏗然有聲。光燭天地。進之。吳
主大喜。建塔奉之。此長干塔爲江南佛寺之
始。有人求經如此。豈恐不爲一說乎。告舍利

法華通義 卷二
下總結正機。前非機之罪窮。却說之不能盡。今正機之益亦窮。却說之不盡也。

妙法蓮華經信解品第四

此述中根領悟。因喻說而生信解也。此品來意四大弟子。因聞世尊譬喻之說。又見身子領悟得記。乃今的信昔果是權。解今一乘是實。因悔恨癡迷。故說窮于喻。以敘本懷。曲盡父慈子頑之狀。以譬怖大之心。既聞開發。今始自信。乃解昔非。故此品來也。信解始此其

意直至囑累品。方盡信解之義。以諸子由信解而堪囑累故。

爾時慧命須菩提摩訶迦旃延摩訶迦葉摩訶目犍連從佛所聞。未曾有法。世尊授舍利弗阿耨多羅三藐三菩提記。發希有心。歡喜踊躍。

此敘四大弟子聞說譬喻。乃生信解。故歡喜踊躍。將敘昔懷也。前法說則身子智慧。上首獨一人領悟。此喻說亦所難信。以從前種種因緣譬喻。談之熟矣。今非昔比。要且非智莫

法華通義 卷二
解。故須菩提稱曰慧命。居上首也。以小乘空
法空生等上首一捨。則衆皆能捨矣。以聞未
曾有法發希有心。所以歡喜踊躍也。

卽從座起。整衣服。偏袒右肩。右膝著地。一心合
掌。曲躬恭敬。瞻仰尊顏。而白佛言。我等居僧之
首。季並朽邁。自謂已得涅槃。無所堪任。不復進
求。阿耨多羅三藐三菩提。世尊往昔說法。旣久
我時在座。身體疲懈。但念空無。相無。作於菩薩
法遊戲神通淨佛國土成就衆生。心不喜樂。所

以者何世尊。令我等出於三界得涅槃證。又今
我等年已朽邁。於佛教化菩薩阿耨多羅三藐
三菩提不生一念好樂之心。我等今於佛前聞
授聲聞阿耨多羅三藐三菩提記。心甚歡喜。得
未曾有。不謂於今忽然得聞希有之法。深自慶
幸。獲大善利。無量珍寶。不求自得。世尊我等今
者樂說譬喻。以明斯義。

此敘得失之情也。居僧之首下。先敘昔之所
以執信小果爲實者。以年朽邁。幸得涅槃之

法華通義 卷三
安。自謂不堪大事。無復進求。無上菩提之心。以此自足。故世尊一向說法。我等疲懈。絕無精進。但念自證空法爲足了。無度生之心。是故於菩薩大法淨佛國土教化衆生之事。心不喜樂。所以不喜者。以世尊始令我等出於三界。我等已出。已證涅槃之果矣。況今年邁。但以無事爲安。是故於菩薩利生成佛之事。不生一念好樂之心。且每聞佛呵白。謂絕無成佛之分矣。豈知昔果是權設哉。我等今於

下級。今信解之情。因聞佛授聲聞成佛之記。所以心大歡喜者。以忽然得聞希有之法。王大寶不求而一旦自得。豈不深自慶幸哉。慶幸之心。無以自見。當說譬喻。以述領悟之意。

譬若有人。季旣幼稚。捨父逃逝。久住他國。或十。二十。至五十歲。年旣長大。加復家困。馳騁四方。以求衣食。漸漸遊行。遇向本國。其父先來求子。不得中止。一城其家大富財寶無量。金銀琉璃。

法華通義 卷二
珊瑚琥珀瓊珠等其諸倉庫悉皆盈溢多有
僮僕臣佐吏民象馬車乘牛羊無數出入息利
乃徧他國商估賈客亦甚衆多時貧窮子遊諸
聚落經歷國邑遂到其父所止之城父每念子
與子離別五十餘季而未曾向人說如此事但
自思惟心懷悔恨自念老朽多有財物金銀珍
寶倉庫盈溢無有子息一旦終沒財物散失無
所委付是以慇勤每憶其子復作是念我若得
子委付財物坦然快樂無復憂慮

此喻信解之情先敘昔日不信之狀也。良以
衆生無明暗蔽真性如幼稚無知背覺合塵
久淪生死如捨父逃逝久任他國備沉五道
生死長遠故如五十其年長大以無善根困
歷四生以苦自活如求衣食以有正因熏習
故漸到本國以本覺法身流轉五道名曰衆
生所謂如來藏轉三十二相入一切衆生身
中如垢衣所纏故云其父先來以背覺合塵
故云求子不得中止一城其家大富等者譬

法華通義 卷二
舍那如來居華藏界現威特身稱法界之莊嚴故云大富珍寶無量等喻佛實智佛有無量知見波羅密皆已具足故云悉皆盈溢僮僕等喻佛方便權智利生之事業臣民可以任使令象馬等可以供運載皆權智也化功歸已故云出入息利應身無量徧十方界故云徧他國多商賈也商賈以主人之本而取利喻佛之應身也久淪生死徧歷諸趣故喻經歷國邑今幸值佛出世故如漸到父城也

父每念子者經云奇哉奇哉一切衆生具有如來智慧德相但以妄想顛倒而不證得所謂與子離別五十餘年心知衆生具有佛性而尚未設化故云未曾向人說如此事但自思惟下喻三七思惟度生之方法心懷悔恨者悔昔既有一乘之緣種不應放捨恨易失而難遇也老朽喻佛因窮果滿若生緣之殆盡也多有財物喻二智甚深無有子息喻無上根以續慧命佛法無傳如家業之散失欲

法華通義 卷二
有所付是以初七思惟以興無緣之大悲也。思法有所付故如來以大事因緣出現於世。但以護念付囑爲懷。若長者思得其子。以付家業始得無憂也。

世尊爾時窮子傭賃展轉遇到父舍住立門側。遙見其父踞師子床寶几承足諸婆羅門刹利居士皆恭敬圍繞以珍珠瓔珞價直千萬莊嚴其身吏民僮僕手執白拂侍立左右覆以寶帳。垂諸華幡香水灑地敲衆名華羅列寶物出內。

取與有如是等種種嚴飾威德特尊窮子見父有大力勢卽懷恐怖悔來至此竊作是念此或是王或是王等非我傭力得物之處不如往至貧里肆力有地衣食易得若久住此或見逼迫強使我作作是念已疾走而去時富長者於師子座見子便識心大歡喜卽作是念我財物庫藏今有所付我常思念此子無由見之而忽自來甚適我願我雖年朽猶故貪惜卽遣旁人急追將還爾時使者疾走往捉窮子驚愕稱怨大

喚我不相犯何爲見捉使者執之逾急強牽將
還于時窮子自念無罪而被囚執此必定死轉
更惶怖悶絕躡地父遙見之而語使言不須此
人勿強將來以冷水灑面令得醒悟莫復與語
所以者何父知其子志意下劣自知豪貴爲子
所難審知是子而以方便不語他人云是我子
使者語之我今放汝隨意所趣窮子歡喜得未
曾有從地而起往至貧里以求衣食

此喻二乘華嚴會上怖大之事也說華嚴時

二乘亦預但未入法界之門故喻窮子遇到
父舍而住立門側也遙見其父踞師子床等
喻說華嚴地上菩薩王件圍繞諸天神王如
吏民僮僕等正喻怖大以有眼不見舍那身
有耳不聞華藏法故如威德特尊卽懷恐怖
而竊以爲王非已可並也以二乘之見狹劣
故念非傭力得物之處以華嚴廣大自在稱
性法門非二乘所堪貧里喻人天小乘易修
易得故如肆力有地衣食易得也或見逼迫

喻無心希求強以大乘見化恐失已利故疾
走而去。見子便識喻普見衆生皆有佛性也。
凡有心者定當作佛故喻思有所付。思念此
子無由見之。喻佛正觀衆生無衆生相。以衆
生任運自然現於平等大悲心中。故如而忽
自來甚適所願也。年朽貪惜喻法報功德佛
所護念。卽遣旁人喻華嚴頓教。乃佛加被菩
薩所說十信法門。知一切法卽心自性成就
慧身。不由他悟。所謂急追將還也。凡非已所

爲而加之曰怨。今作佛本非二乘所求。故喻
不相犯而見捉。華嚴四十二位。一一皆說菩
薩求佛果海。利生之事故。喻執之逾急。強牽
將還。菩薩往來三界。利生遊戲神通之事。二
乘觀三界如牢獄。厭四生如桎梏。故喻窮子
念無罪而被囚執。此必定死。悶絕躡地。正喻
有眼不見有耳不聞之狀也。二乘去果海甚
遠。故喻父遙見。然一乘頓法被機。不廣思欲
開權。故縱之勿強。誠莫與語也。所以者何。下

釋縱放所以將申設權之意也。佛自知一乘頓法非劣根所堪。故喻如長者自知豪貴爲子所難。言審知等者。喻若衆生全無佛性。則已。苟有佛性。不愁不受其化也。因此故須方便以度之。正喻將欲施權也。不語他人云是。我子喻待其時聽自信也。放之者任之而已。喻不強化。往至貧里喻樂爲鄙事。既知是子而縱之者。意在必須方便。此二乘之權特爲不信劣根衆生所設明矣。

爾時長者將欲誘引其子而設方便密遣二人形色憔悴無威德者。汝可詣彼徐語窮子。此有作處。倍與汝直。窮子若許將來。使作若言欲何所作。便可語之。雇汝除糞。我等二人亦共汝作。時二人卽求窮子。旣已得之。具陳上事。爾時窮子先取其價。尋與除糞。其父見子慙而怪之。又以他日於窓牖中遙見子身羸瘦憔悴。糞土塵坌污穢不淨。卽脫瓔珞細軟上服。嚴飾之具。更著麤弊垢膩之衣。塵土坌身。右手執持除糞。

法華通義 卷二
之器狀有所畏語諸作人汝等勤作勿得懈怠
以方便故得近其子後復告言咄男子汝常此
作勿復餘去當加汝價諸有所須盆器米麵鹽
醋之屬莫自疑難亦有老弊使人須者相給好
自安意我如汝父勿復憂慮所以者何我年老
大而汝少壯汝常作時無有欺怠瞋恨怨言都
不見汝有此諸惡如餘作人自今已後如所生
子卽時長者更與作字名之爲兒爾時窮子雖
欣此遇猶故自謂客作賤人由是之故於二十

年中常令除糞過是已後心相體信入出無難
然其所止猶在本處世尊爾時長者有疾自知
將死不久語窮子言我今多有金銀珍寶倉庫
盈溢其中多少所應取與汝悉知之我心如是
當體此意所以者何今我與汝便爲不異宜加
用心無令漏失爾時窮子卽受教勅領知衆物
金銀珍寶及諸庫藏而無希取一餐之意然其
所止故在本處下劣之心亦未能捨

此喻施權也將欲等將者且然未必之辭喻

法華通義 卷二
佛未現應身先遣菩薩內秘外現以同事攝誘引二乘爲先導也。除糞喻斷煩惱以華嚴說無明十二因緣卽普光明智此豈二乘所堪。故說小乘斷見思速取小果易見効也。故云先取其價。慕果修因故喻尋與除糞見子愍怪喻興慈悲也。窓牖遙見等喻佛未現身前以佛眼觀見六道衆生貧窮無福慧因此三七思惟以方便度脫也。卽脫瓔珞等喻佛隱于丈尊特之身現丈六老比丘相右手執

除糞器等喻隨順劣根三十四心斷結成佛之事。因此得與二乘周旋故喻以方便故得近其子也。咄男子等斥使安意無復他慕喻諸小乘初從外道親近於佛恐有退墮之意故斥使安之也。當加汝價等小乘始學七方便得證初果如一日之價由是而進二三四果漸入大乘故喻加價也。諸有所須等者喻三十七品助道之法。老弊使人喻小乘神通皆佛所棄故如老弊。我如汝父者喻釋迦示

法華通義 卷二
三藏果頭佛以非真佛故云如父所以者何
下喻上如父而漸親之意。嗔恨諸惡喻外道
謗佛更與作字名之爲兒喻二乘與諸菩薩
同入法性皆當稱子但幼小無力故名爲兒
爾時窮子下喻歷阿含方等斷見思煩惱故
云二十年中常令除糞過是已後下喻歷方
等而入般若彈呵淘汰之功。二乘之人於此
漸向大乘故云心相體信般若會上佛命須
菩提轉教菩薩人。雖小乘能說大法故云聞

入無難。未捨小果故云所止猶在本處。長者
有疾等喻憂慧命未續涅槃將至也。以般若
未盡法界之量故云多少取與。令二乘轉教
故云汝悉知之。將定父子之分故先囑云當
體此意般若乃平等佛慧故喻父子不異將
有付囑故云宜加用心無令漏失。上皆喻佛
命二乘轉教之辭也。卽受教勅下喻奉命轉
教故般若萬行二乘悉知故喻領知衆物。但
以非已智分故喻無希取一餐之意。以二乘

法華通義 卷二
米肯卽捨小果故喻窮子下劣之心亦未能捨也。已上通喻昔失。蓋約四十季前之事。下喻今得正顯此會。

復經少時父知子意漸以通泰成就大志自鄙先心臨欲終時而命其子并會親族國王大臣剎利居士皆悉已集卽自宣言諸君當知此是我子我之所生於某城中捨我逃走玲嶸辛苦五十餘年其本字某我名某甲昔在本城懷憂推覓忽於此間遇會得之此實我子我實其父

今我所有一切財物皆是子有先所出內是子所知世尊是時窮子聞父此言卽大歡喜得未曾有而作是念我本無心有所希求今此寶藏自然而至

此喻今得也。復經少時等喻說般若後二乘已有樂大之心也。臨欲終時等喻涅槃時至卽說此經授記二乘作佛也。將欲付囑乃因多寶集十方分身諸佛證明此法。故云并會親族等。宣言等喻此經中說往昔教化因緣。

法華通義 卷二
之事一切財物皆是子有喻今授記依正劫
國莊嚴等事也窮子聞父此言卽大歡喜正
喻今得也

世尊大富長者則是如來我等皆似佛子如來
常說我等爲子世尊我等以三苦故於生死中
受諸熱惱迷惑無知樂著小法今日世尊令我
等思惟蠲除諸法戲論之糞我等於中勤加精
進得至涅槃一日之價旣得此已心大歡喜自
以爲足便自謂言於佛法中勤精進故所得弘

多然世尊先知我等心著弊欲樂於小法便見
縱捨不爲分別汝等當有如來知見寶藏之分
世尊以方便力說如來智慧我等從佛得涅槃
一日之價以爲大得於此大乘無有志求我等
又因如來智慧爲諸菩薩開示演說而自於此
無有志願所以者何佛知我等心樂小法以方
便力隨我等說而我等不知真是佛子今我等
方知世尊於佛智慧無所吝惜所以者何我等
昔來真是佛子而但樂小法若我等有樂大之

心佛則爲我說大乘法於此經中唯說一乘而昔於菩薩前毀訾聲聞樂小法者然佛實以大乘教化是故我等說本無心有所希求今法王大寶自然而至如佛子所應得者皆已得之

此以法合喻也佛視衆生如一子而二乘人心以菩薩爲真子自視爲似子而已佛因衆生苦故特說出苦小乘之法諸聲聞人以爲諸苦熱惱迷惑求脫心切故樂著小法此樂小之情也三苦者謂苦苦壞苦行苦也今日

世尊下合滯權之情也世尊以方便力等敘佛令二乘說般若轉教菩薩之事以得小果爲足故於大乘般若無有志求我等又因下敘世尊知我樂小故不卽爲授記故我等不知真是佛子總上通合昔失也今我等下合今知不失也以今日觀佛慈悲方知昔日元無秘悋而我等亦未嘗失但不樂大耳於此經中下敘悟佛心觀今爲說一乘則知昔彈呵之時早欲以大乘教化矣此謂是我等咎

也是故下正合今得。今見世尊說此大法。特爲身子授記。且云千二百人皆當作佛。此實法王大寶不求自至。所以爲大慶幸也。

爾時摩訶迦葉欲重宣此義而說偈言

我等今日聞佛音教歡喜踊躍得未曾有。佛說聲聞當得作佛。無上寶聚不求自得。譬如童子幼稚無識捨父逃逝。遠到他土。周流諸國。五十餘年。其父憂念四方推求。求之既疲。頓止一城。造立舍宅。五欲自娛。其家巨富。多諸金銀。磚磔

碼礫珍珠琉璃象馬牛羊輦輿車乘田業僮僕。人民衆多出入息利。乃徧他國商估賈人無處不有。千萬億衆圍繞恭敬。常爲王者之所愛念。群臣豪族皆共宗重。以諸緣故往來者衆。豪富如是有大力勢。而年朽邁。益憂念于夙夜。惟念死時將至。癡子捨我五十餘年。庫藏諸物當如之何。爾時窮子求索衣食。從邑至邑。從國至國。或有所得。或無所得。饑餓羸瘦。體生瘡癬。漸次經歷。到父住城。傭賃展轉。遂至父舍。爾時長者

於其門內施大寶帳處師子座眷屬圍繞諸人侍衛或有計筭金銀寶物出內財產注記券疏窮子見父豪貴尊嚴謂是國王若國王等驚怖自怪何故至此覆自念言我若久住或見逼迫強驅使作思惟是已馳走而去借問貧里欲往傭作長者是時在師子座遙見其子默而識之卽勅使者追捉將來窮子驚喚迷悶躡地是人執我必當見殺何用衣食使我至此長者知子愚癡狹劣不信我言不信是父卽以方便更遣

餘人眇目縫陋無威德者汝可語之云當相雇除諸糞穢倍與汝價窮子聞之歡喜隨來爲除糞穢淨諸房舍長者於牖常見其子念子愚劣樂爲鄙事於是長者著弊垢衣執除糞器往到子所方便附近語令勤作旣益汝價并塗是油飲食充足薦席厚煖如是苦言汝當勤作又以輒語若如我子長者有智漸令入出經二十年執作家事示其金銀真珠玻瓈諸物出入皆使令知猶處門外止宿草菴自念貧事我無此物

法華通義 卷二
父知子心漸已曠大欲與財物卽聚親族國王大臣剎利居士於此大衆說是我子捨我他行經五十歲自見子來已二十年昔於某城而失是子周行求索遂來至此凡我所有舍宅人民悉以付之恣其所用子念昔貧志意下劣今於父所大獲珍寶并及舍宅一切財物甚大歡喜得未曾有

此頌通敘信解之情也。譬如下頌喻昔失也。初入句頌子逃父求也。求之下三十四句頌

喻善提塲思化有緣之衆也。死時將至喻不化衆生慧命將絕也。爾時窮子下十二句喻迷淪之事也。求索衣食喻在迷中有出苦之心也。有得無得喻從小乘外道修習也。饑餓等喻未得正修返傷法體也。遂至父舍喻到覺塲未敢入也。爾時長者下十句喻說華嚴時也。窮子見父下十四句喻乍見法界之事也。長者是時下十二句頌喻說華嚴大法也。但普觀衆生具有佛性未卽開說故云默識。

驚愕等正喻聞說頓法怖大之事也。長者知
子下十二句頌喻開權也。遣人卽內秘外現
以示同事攝也。窮子下四句喻樂小。長者於
牖下十句喻隱勝現劣也。旣益汝價下八句
喻說小果修進之法也。若汝也。如我子似子
而已非真子也。長者有智下十二句頌喻般
若時也。入出二十年。正喻轉教般若之事以
非已智分故云我無此物而不希取也。已上
通頌喻昔失父知下二十一一句頌說法華因

緣之事也。今於下六句頌喻今得上頌喻說
下法合也。

佛亦如是知我樂小未曾說言汝等作佛而說
我等得諸無漏成就小乘聲聞弟子佛勅我等
說最上道修習此者當得成佛我承佛教爲大
菩薩以諸因緣種種譬喻若干言辭說無上道
諸佛子等從我聞法日夜思惟精勤修習是時
諸佛卽授其記汝於來世當得作佛一切諸佛
秘藏之法但爲菩薩演其實事而不爲我說斯

法華通義 卷一
真要如彼窮子得近其父雖知諸物心不希取
我等雖說佛法寶藏自無志願亦復如是我等
內滅自謂爲足唯了此事更無餘事我等若聞
淨佛國土教化衆生都無欣樂所以者何一切
諸法皆悉空寂無生無滅無大無小無漏無爲
如是思惟不生喜樂我等長夜於佛智慧無貪
無著無復志願而自於法謂是究竟我等長夜
修習空法得脫三界苦惱之患任最後身有餘
涅槃佛所教化得道不虛則爲已得報佛之恩

我等雖爲諸佛子等說菩薩法以求佛道而於
是法永無願樂導師見捨觀我心故初不勸進
說有實利如富長者知子志劣以方便力乘伏
其心然後乃付一切財物佛亦如是現希有事
知樂小者以方便力調伏其心乃教大智我等
今日得未曾有非先所望而今自得如彼窮子
得無量寶世尊我今得道得果於無漏法得清
淨眼我等長夜持佛淨戒始於今日得其果報
法主法中久修梵行今得無漏無上大果我等

法華通義 卷二
今者真是聲聞以佛道聲令一切聞我等今者
眞阿羅漢於諸世間天人魔梵普於其中應受
供養

佛亦如是下八句頌合樂小故爲說小法也。
佛勅我等下三十二句通合滯權也佛勅下
至說無上道合說般若教菩薩事也諸佛子
下。至當得作佛合聞般若菩薩各得授記成
佛也。一切下。至說斯真要合自滯權小疑佛
不爲說大也。如彼下重喻滯權故云自無志

願非佛愒而不教也我等內滅下二十一句
重明初心樂小所以貪著小乘得少爲足故
不生喜樂因此故於般若佛慧無復志願以
自所得法將爲究竟耳我等下十六句重敘
樂小之心卽以所得小果謂已報佛恩矣所
以自足而不進也我等雖爲下二十二句重
明滯權佛卽縱捨以待時也以待調伏其心。
然後乃教大智佛恩難報正在於此我等今
下二十八句正敘今得言得道得果正明

法華通義 卷二
今悟一乘實智也。以持淨戒修梵行而今
乃得無上大果。是知今實亦由昔權而至也。
前云若不信此法非阿羅漢。今日乃知是真
阿羅漢。應受人天供養也。

世尊大恩以希有事憐愍教化利益我等無量
億劫誰能報者手足供給頭頂禮敬一切供養
皆不能報。若以頂戴兩肩荷負於恒沙劫盡心
恭敬又以美膳無量寶衣及諸臥具種種湯藥
牛頭旃檀及諸珍寶以起塔廟寶衣布地如斯

等事以用供養於恒沙劫亦不能報。諸佛希有
無量無邊不可思議大神通力無漏無爲諸法
之王能爲下劣忍于斯事取相凡夫隨宜爲說
諸佛於法得最自在。知諸衆生種種欲樂及其
志力隨所堪任以無量喻而爲說法。隨諸衆生
宿世善根又知成熟未成熟者種種籌量分別
知已於一乘道隨宜說三

此明深知大恩念不能報也。世尊下二十六
句申明恩大難酬。謂佛以希有事方便憐愍。

法華通義 卷二
教化利益我等。脫億劫難拔之苦。證無上菩提之果。何恩大於此哉。所以無量億劫無能報者也。手足下言難報之事。以思量如空安。可以有相身心身外長物。而可以報哉。所以於恒沙劫。亦不能報也。諸佛希有。下十句重申難報之所以也。以佛自證無量不可思議廣大神通。而能爲我等下劣衆生。忍於斯事。且又爲我等取相。凡夫曲施方便。隨宜而說。此世尊慈悲大恩。無可爲喻。豈能報耶。諸佛

於法下十六句。述明隨宜而說。以感方便大恩也。所以能隨宜而說者。以佛得最自在之法。所謂我爲法王。於法自在。故能知衆生種種樂欲。隨力所堪。故以無量譬喻言詞。而爲說法。隨根授法。種種籌量。分別知己。故於一乘法。隨宜說三。此領三七思惟之事。感此曲垂方便之恩。至難酬報者。此也。旣不能報。惟心感而已。從上佛祖知恩者。希果能知恩。則爲的骨子矣。窮子一語。描寫窮子始終之情。

狀吐露當機之本心。有如此之詳且盡者。

苟不知恩。何能有此。

妙法蓮華經通義卷第二終



南嶽門人方玉校對

嘉興府嘉善縣旅泊居士沈豫昌

法名廣豫同男沈受祺助刻此卷

經文通義共記字二萬

捐資 兩 錢 分

廿

十六

